

佛说月光童子经 1 卷

No. 534 [Nos. 535, 536]

佛说月光童子经

西晋月氏三藏竺法护译

闻如是：

一时，佛游王舍城灵鹫山，与大比丘众千人俱，圣通无碍悉皆应真，漏结已解生死已断，秽冥已索慧明独存；菩萨二万，神通圣达统都三界，总摄诸法权慧无方，逮佛神德住无所住。

尔时，世尊游于王舍大城之中，广演道义开化群生，天神、地神、海灵、鬼神、帝王、臣民、三界众生皆来稽首，供养神化。

世无佛时，外道兴隆，犹如冥夜炬烛为明；天下有佛群邪尽歇，譬如日出火无复光，国中本事外道邪见不兰迦叶等六师，佛以正真之道训诲天下。

是时，六师尽废不见信奉，诸异道等心怀嫉妬，谋欲毁佛还望敬事。于是，六师召其门徒、合众弟子会于一处，共集论议：「吾等道德高远名著四海，众儒共宗国主所奉，人民男女莫不信仰，于十六大国尽世供养。吾德如风民应如草，靡不稽首各等足下者；今佛出世现神道化，吾等便为人弃不见信奉，乃令我等饮食不甘卧起不安，出入行步恒怀愁愤，心中麁毒悉欲发狂，当作何计以毁辱之？逐使出国令人不见，尔乃还复吾供养耳。」共议此已，各相谓言：「罗阅大城之中有势强长者，国相大臣名为申日，信奉吾等执心不二，恒毁佛道以为虚伪，惟有此人势力威强，能助我等毁辱除去。」

于是六师即从坐起，将五百弟子到王舍大城诣申日家。申日见诸师来，即下正殿迎为作礼，施好榻机饭食毕盥，拱手对坐。诸师告曰：「吾等故与大众来造长者，欲议一事愿垂听省。」

申日白言：「惟蒙训诲，愿乐欲闻。」

六师俱曰：「吾等此国之师，功名勋着群儒稽首，国主致敬大臣所奉，于十六大国独言只步。长者所知，佛出于世自称圣智，幻术欺巧倒正反说，欲与吾等列圣并智，齐威等神幻惑人民。国人愚冥信奉其道，疑惑天下沮败善心，更谓吾等无有道德不见信奉。长者豪强，帝王所钦国民伏信，威振四海天下望风，深惟师徒终始义重，记功列勋传之来世，愿为吾等毁辱除之，令灭不见，复吾供养，岂不快哉！」

长者启白：「敬承来告，忆昔往日，我之愚兄奉佛之故毁辱诸师，从此以来实怀忿恚，每欲规图执事靡由。今被圣教合我本心，当展力效命尽节于师。」

诸梵志曰：「吾向共议，欲令长者当于门中，凿作五丈六尺深坑，以炭火适半细铁为椽土薄覆上，设众饮食以毒着中，若火坑不焚毒饭足害，便往请佛。佛常自云有三达之智，神通无碍，照见未然，明祸福之原、吉凶所趣，实无此分，而但诳惑万姓，审有此智当不受请，若无此智必自受之，今欲以此规图于佛。」

申日闻之，欣然大悦赞言：「善哉！诚如大师之所教勅，此谋深密高妙实为奇异，以此图之何忧不获。辄如圣教，作火坑毒饭，严以待之。」

尔时，不兰迦叶五百弟子，见申日计共谋同，欢喜踊跃不能自胜，咸共起住，同声举手称赞申日：「善哉！真是圣明第一弟子。」

申日重启：「今自忧之，必自严办，比令明日诸师当见。」长者礼已，诸师各还。

于是，申日勅外严驾导从前后，便诣佛所，下车却盖，解剑脱履，拱手直进，稽首足毕，长跪白佛：「唯然，世尊！饥渴神化乐仰清风，世事多缘奉敬靡由，今故请现稽首禀化。」

佛告贤者：「明日至心向于如来。」

申日启言：「明日欲设微饭，惟愿世尊与诸圣众降德屈神。」是时，世尊愍其狂愚，欲济脱之，默然受请。申日内喜，心自念言：「果如规计。」礼毕辞退。过六师所，诸师迎问：「为受请不？」申日启白：「承诸师威力，已

受我请，果如所图。」诸师及五百弟子皆大欢喜不能自胜，诸梵志等普喜并言：「长者速还，作火坑、毒饭，严以待之。」

长者还家，勅外密令，中门外掘作火坑、毒饭严以待之。

长者有子，名曰月光，厥年十六，天姿挺特仪容端正，博通群籍贯综神摸，天文、地理靡不照焉，高名动世群儒师仰，慈悲愍世生死之苦，降德普入欲度众生，谏父申曰：「佛为大圣三界之尊，道德清净言教真正，三达之圣慈悲喜护，心过慈母当蒙得度，更兴逆恶悻望天福，岂不惑哉？」

「昔者，世尊求道之日，坐于道场元吉树下，第六天魔见佛高远三毒已灭，秽冥以索慧明独存，神圣无上诸天所宗，上帝亲下万神侍卫，内怀嫉妬心中烦毒，念其道成当必胜我，饮食不甘伎乐不御，即升正殿召博闻臣，议设方计毁败其道。群臣启曰：『菩萨神圣道力无上，威震三界德伏十方，非是臣等所可谋向。』」

「于时魔王赫威奋发震曜天地，召诸鬼兵兴军聚众，带甲亿万旌旗曠日光曜蔽天，宣勅士众皆使变化，奇形异类数百千种，虫头人躯鬼魅可畏，担山负石口眼吐火，围遶菩萨齐声踏地，牛吼唱噉震动八荒，山崩地裂树木摧折，海水波荡踊沸六原，溢流浩汗高波滔天。百姓惊怖巢木栖山，潜龙妄踊，鸷鸟惊翔，师子慑窜，金翅鸟王魔竭大鱼顺流低仰，群神怖悸逃走遁藏，千变万化群凶相将，毒恶逆类弥漫纵横，一时集恶向于世尊。」

「佛直以放慈心之力，举手指之，群恶鬼兵一时伏擗，齐心叉手头面自归。当于尔时，如来即便降伏，弥天之恶化为弟子，虽获得胜无忧喜想。以是方之火坑、毒饭何足言乎？须弥之毒大千刹火，刀剑矛刃亦不能动佛一毛也，今以火坑、毒饭欲毁于佛，譬如蚊虻之势欲坠大山，蝇蠅之翅欲障日月，徒自毁碎，不如早悔首过免罪。」

「天龙、鬼神、世间、人民、梵释、魔王莫不稽顙受佛化者。如来之身金刚德体，众恶尽灭万善积着，相好光明神器无喻，永除五道之大冥，获无上正真之独明，处众圣之上犹星中之月，如日初出照于朝阳，广陈道化导世凶愚，怀慈四等愍伤众生，施恩济苦心过慈母。佛之道德神化如此，愿父改悔归命三尊。」

尔时，长者申日罪盖所蔽心不开解，告子月光：「假使如来之德如子所叹，佛有神通照见未然者，当豫知我作火坑、毒饭，今何以故受吾之请？以此推之知无远虑。」

月光复言：「佛实有三达之智、六通之明、大慈四等靡不贯综，常度愚闇不逆人意。」

申日心迷执愚不舍，明旦遣人请佛，使者受教诣世尊所，长跪白佛言：「长者申日启言：『日时已至饭食以具，惟愿举众降德自屈。』」

尔时，世尊心自念言：「今受申日之请不与常同，当放威神感动十方，令子心伏必就大道广化无涯，并化六师及九十六种外道。」于时，世尊放大光明，上照三十三天，下彻十八地狱，极佛境界皆大光明神通。菩萨、罗汉、缘觉，梵释天王、海灵地祇及诸鬼兵，各将部党亿万无数，闻度申日，皆来诣佛，稽首足毕，翼从左右。佛告诸比丘：「执持应器，当就长者申日请。」

诸比丘咸曰：「受教。」肃然严持地即金色，当佛顶上有七步香云红黄青绀紫白莲华，自然涌出狭道两边。

佛甫出门，告空无吉祥菩萨等六十万人在前导从，或行虚空，或现于地，佛处中央，其余无限之众皆随佛后，光明赫奕遏日绝月晃照一切，天施宝盖华下如雪，天龙、飞鸟不敢历上，三界众生无见顶者，天乐皆下同时俱作，毒虫隐伏吉鸟翔鸣，佛不蹈地相轮印成，光明晃耀七日炽盛。宝树、药树、诸众果树，睥睨[跳-兆+叵][跳-兆+我]低仰如人跪礼之形。闍叉、金翅、厌鬼、魅鬼，各将营从庄严分部，千百为众手执伎乐，或持香华、七宝璎珞、天缯幡盖。十方来会，天人亦下乐器亦鸣。盲视聋听痴言蹉行，怨憎和慈，迷寤醉醒，妇女钗钏相振作声，飞鸟、走兽皆作人形。百岁枯木自然华生，饿鬼饱满地狱安宁，琵琶箏笛击鼓乱鸣。

佛以神德变化火坑，即成七宝紫绀浴池八味之水，底有金沙边有莲华，鱼鳖鼃鼃池中喜踊，飞鸟、走兽音声相和，池边行列丝竹衣树，树间皆悬罗縠缣绣，珊瑚、宝树、水精、琉璃、黄金、白银为枝叶，紫磨黄金为绳，连绵交错树间，垂天璎珞互相连结，风起吹之转相振触，妙音百种自然宣出，叹佛神德至未曾有，皆说无常苦空非身之声，使悲者更喜喜者更悲。其七宝树上则有群鸟：孔雀、鹦鹉、金翅鸟王、赤髯神鸟、凤皇吉鸟、拘耆那罗吉祥

鸟，比数百千种，光色显赫群飞树间，哀鸾百种感动人情咸来集听，走兽息食飞禽止听，形异心同归命世尊。

当于尔时，海灵、地祇、三界众生其来从者，见火坑变为浴池，天地震动，神变若此道德殊绝，皆看申日。申日见之，心动神惊衣毛起竖，悼惶怖悸精神失守，心自念言：「咄哉！迷惑！我之逆恶所为无边。」顾谓六师：「坐汝畜类沈吾汤火，我今如何？」六师恐怖惭耻无言，惧获重罪即各逃窜。

于是，申日与子月光、夫人、嫫女、眷属男女、外道伴党俱出迎佛。遥覩世尊洪焰晖赫晃若宝山，天姿紫金巨容丈六，神颜从容诸根寂定，相三十二好八十种，天中之天道德堂堂，十力世尊天人中王，佛以神德照愚冥心。申日意解，如迷得正，狂病瘳除，五情内发悲喜交集，即前首罪，五体投地稽首作礼：「唯然，世尊！恕我盲冥，不识正真用信恶言，兴毒害意欲危天尊，幸赖慈化乞原罪咎，垂哀接济得免大罪，愿前就坐。」

实时，如来升于正殿，众坐已定。申日惭怖心不自安，前白佛言：「为盲冥所误，信妖邪之言以为真谛，如狂服药病更增剧，始今覩佛，邪病得除，所为无道饭食之中，悉皆着毒不可供养，以御大圣。愿待须臾更严餐具。」

佛告长者：「便持饭来，不足更设，贪淫、瞋恚、愚痴、邪见世之重毒，吾无此毒，毒已灭尽，毒不害我。」

申日下食，香彻八难，饿鬼得安。食已行水，众会寂然。申日退坐，垂泣启言：「唯然，世尊！恕我迷惑，敢图逆恶向于如来，自揆罪重应入地狱，汤火痛考长夜受苦，将脱何由？佛为大慈三界之救，愍念众生济其涂炭，昨不诫我令我罪成，得无世尊不豫知也。」

佛告申日：「昔定光世尊授我菽时：『汝却后无数阿僧祇劫，当于五浊恶世作佛，广度众生如我今日，当有长者申日，火坑、毒饭，规图害汝。』我乃尔时得明慧三昧，时已豫知汝姓字，况于昨日而当不知。」

申日欢喜言：「世尊乃豫知无数劫事，我既觉悟会得免罪，今我尽心自归于佛，所为之非愿，令重罪而得微轻。」

佛本有誓不舍愚惑，即告申日：「善哉！长者！能自觉悔重罪必除，吾当为汝演说道义，令汝心解。」

对曰：「唯然，天中天！愿乐欲闻，毕死善道尽心不忘。」

则时世尊譬扬洪音，出八种声演万亿音，广说无量法言：八解、四谛、三脱、六度，探道法要微妙之行，解三界空诸法因缘造为罪福，观病选药如应说法。

申日情悟坦然，心开疑解结除，[火*霍]然无想寂然入定，即于座上逮不退转，喜踊升空去地百四十丈，从空来下稽首于地，鸣佛足、摩佛足，长跪自陈：「今已觉悟从佛得度，欣然叹佛，佛十力雄哉！如来神力震伏十方无敢当者，火坑、毒饭豫自消亡；佛无忧哉！一切刀剑不能伤害，急箭劲刃皆化作华；佛勇猛哉！如来皆能降伏邪道九十六种，异口同音皆叹大道；佛金刚哉！佛若金山晃照一切，闇冥坏败慧火独明，超度群圣之上德过虚空，辩才不尽开阐法言告于大千，调诸刚强令使熟成，威震三界独而无侣，离诸尘劳净若天金，雨诸法宝饱满一切，施以无尽七大之财，观心选药先坏魔兵，如应开法靡不得度，九十六种邪道隐蔽。」

当于，申日叹佛法时，无限之众其来大会，皆乐法音，得福得度不可称计。天地震动，乐器作声，第七梵王宣闻法言，琵琶磬鼓千种伎乐自然而鸣，忉利天帝华散佛上，叹佛圣德至未曾有。

当此之时，莫不欢喜，稽首作礼而去。

佛说月光童子经

【经文信息】大正藏第 14 册 No. 0534 佛说月光童子经

【版本记录】CBETA 电子佛典 Rev. 1.16 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，Jasmine 提供新式标点

【其他事项】本数据库可自由免费流通，详细内容请参阅【[中华电子佛典协会数据库版权宣告](#)】
